

15.03.2013.

Messer podržava naučna istraživanja

Od 7. do 10.03.2013. godine u Sarajevu, u prostorijama Centra za interdisciplinarnu postdiplomske studije (CIPS), održana je prva konferencija mreže njemačkih doktoranata na Zapadnom Balkanu (Dong). Pod vodstvom docentica sa Univerziteta Regensburg (Njemačka) i Univerziteta Beč (Austrija) ukupno 27 doktorskih studenata germanistike iz Slovenije, Srbije, Hrvatske i svih dijelova Bosne i Hercegovine sudjelovalo je u radionicama za naučni rad. Na seminarima je fokus stavljen na istraživanje doktoranata, koje se provodi pod nadzorom post-doktoranata u regiji i održan je uz podršku Messer BH Gasa.

"Mi u Messeru držimo da se ulaganje u obrazovanje ne može ničim mjeriti. Uvjereni smo da se učenjem stranih jezika smanjuje prag nerazumijevanja među ljudima. Jezik je osnova za izgradnju dobrih odnosa između zemalja. Zato nam je zadovoljstvo kada možemo svojim resursima potpomoći proces edukacije na svim nivoima i učestvovati u razmjeni znanja, iskustava i naučnih dostignuća", istakao je generalni direktor Messer BH Gasa g. Valentin Ilievski.

"Važno je da se mladim doktorantima pruža mogućnost da zajedno sa njemačkim docentima i kolegama Zapadnog Balkana prevaziđu svoje poteškoće i da jedni drugima na taj način pomognu", izjavila je doktorantica Đana Tufekčić Rekić iz Tuzle.

No, nije samo profesionalna razmjena bila u središtu konferencije. Pauze na konferenciji su korištene za međusobno upoznavanje i razmjenu iskustava.

"Vrlo smo zadovoljne tokom konferencije," izjavile su Kathrin Jurkat i Dorothee Baumann, organizatorice konferencije DONG. "Nadamo se da smo mogli pomoći ne samo pojedinim doktorantima u razvojnom istraživanju, nego i osnažiti germanistiku na Zapadnom Balkanu, te osigurati osnovu za dugoročno umrežavanje."

Kompanija Messer će u skladu sa svojom korporativnom politikom nastaviti podržavati razvoj nauke i implementaciju naučnih znanja u društveno korisne svrhe.

22.05.2013.

Malonogometni turnir Kick&Fun održan deveti put

Predstavništvo Njemačke privredne komore u BiH u saradnji sa Udruženjem za unapređenje njemačko-bosanskohercegovačkih privrednih odnosa u subotu, 18.5.2013., u sportskom centru MG-MAS u Sarajevu organiziralo je svoj tradicionalni turnir u malom nogometu Kick&Fun 2013.

Cilj ove zabavne i sportske manifestacije je povezivanje bh. i njemačkih privrednika u opuštenu i rekreativnu atmosferu, ali i prikupljanje pomoći za socijalno ugrožene grupe.

Tako je i ove godine cjelokupan nagradni fond ustupljen humanitarnim organizacijama.

Posjetioci ovog devetog po redu turnira imali su priliku uživati u specijalitetima s roštilja, kolačima, kao i u njemačkom pivu, a mališane je zabavljao dječiji animator.

Učesnici turnira bili su: Alba Zenica, ASA Group, Bader Šamac, BBM Vareš, Centrotrans Eurolines, DHL International, Emka Bosnia, Graewe Tadić, Grand Hotel Bristol, Henkel BH, Messer BH Gas, Prevent BH, Sberbank BH, Stanić Group Industry, Tvornica cementa Kakanj, Volkswagen Sarajevo, Xella BH.

Prvi udarac na turniru izveo je Valentin Ilievski, generalni direktor Messer BH Gas/Messer Tehnoplina.

Messer BH Gas je ušao u četvrtfinale, gdje nas je elimirala pobjednička ekipa turnira Emka.

26.05.2013.

Iz Messera lansiran burek u svemir

Pod motom "Burek u svemiru - legenda je postala stvarnost" dvojica entuzijasta iz Sarajeva krenula su u naučno-popularnu misiju kojom dokazuju koliko daleko burek može ići.

Inspirirani Nadrealistima i njihovom parodijom na Star Trek „Burek u svemiru“, Adnan Pašić i Emir Hašimbegović pustili su balon u svemir sa kamerom i burekom. Lansiranje je obavljeno u Rajlovcu, u krugu zgrade Messer BH Gasa i Messer Tehnoplina.

Specijalni balon zahtijevao je i specijalni plin. Zahvaljujući našim inženjerima balon je napunjen helijem i u svoj svojoj bjelini i punini povukao najpoznatiji bh. specijalitet.

Lansiran iz Sarajeva, prvi bosanski astronaut dosegao je 25 km visine da bi se javio GPS-om poslije sat i 40 minuta iz šume kraj sela Gornje Vrsinje, Milići.

Burek se vratio brzinom od 600 km/h i dokazao, kako kažu ova dvojica entuzijasta, da nije tačno da oni koji iz Bosne odu u nju se više ne vraćaju.

Kako je to izgledalo, pogledajte u sljedećem prilogu: [Burek u svemiru](#).

21.06.2013.

U Mostaru kompanija Messer proslavila jubilej

Danas je u sjedištu kompanije Messer Mostar Plin održana press konferencija i na svečan način obilježeno 15 godina Messera u BiH.

Na press konferenciji menadžment kompanije osvrnuo se na prethodni period, ulaganje u privredu i industriju BiH, stručnost uposlenih i infrastrukturu, kao i najavio nove investicije.

Messer u BiH se na tržištu BiH nalazi od 1997. godine, raspolaže sa tri društva (Messer Tehnoplina, Messer Mostar Plin i Messer BH Gas), dva proizvodna postrojenja (Zenica i Sočkovac), 3 punionice i 4 distributivna centra. Agencija za unapređenje stranih investicija FIPA dodijelila je Messeru priznanje najvećeg stranog investitora za 2009. godinu. Do danas su financijska ulaganja ove kompanije u BiH premašila cifru od 100 miliona KM, dok je uposleno preko 100 ljudi.

Na press konferenciji su se novinarima obratili g. Stefan Messer, vlasnik Messer Group, najveće svjetske kompanije za proizvodnju i snabdjevanje tehničkim i specijalnim plinovima, generalni direktor Messer BH Gas/Messer Tehnoplina g. Valentin Ilievski, direktor Messer Mostar Plina g. Ivan Maslač i gradonačelnik Mostara g. Ljubo Bešlić.

Direktor Messer Mostar Plina Ivan Maslač osvrnuo se na razdoblje kada je Messer ušao u BiH i kada je kompanija 1. jula i zvanično počela s radom pod nazivom Messer Mostar Plin.

-S Messerom mi smo svi u firmi osjetili veliko poboljšanje, promjene nabolje, stekli smo sigurnost i ne plašimo se našeg opstanka ovdje, istakao je Maslač, dok je direktor Messera u BiH g. Ilievski istakao da su orijentirani na proizvodnju i da su u samo tri godine otvorili dvije fabrike u BiH – kisikanu i fabriku CO<sub>2</sub> kojim snabdijevaju najveće bh. potrošače.

- Sto miliona KM koje su investirane u BiH najbolji su dokaz i garancija da Messer ostaje ovdje i ide dalje, zaključio je Ilievski.

Na proslavu je stigao i vlasnik ove njemačke porodične kompanije s tradicijom dugom 115 godina, g. Stefan Messer, koji je rekao: - Za kompaniju Messer tržište Bosne i Hercegovine je izuzetno značajno zbog očevidnih predispozicija koje vaša zemlja ima u pogledu razvoja industrijskih kapaciteta. Stoga ovdje vidimo mogućnost snabdijevanja raznih potrošača kojima su ovi plinovi neophodni u proizvodnom procesu, ali i priliku da ih eksportiramo u druge zemlje.

Gradonačelnik Mostara Ljubo Bešlić je potcrtao važnost ove kompanije u kreiranju pozitivne slike o Mostaru i BiH za strane investitore i naglasio da je Messer najbolja preporuka drugim inozemnim kompanijama za djelovanje u našoj zemlji.

Nakon press konferencije uslijedila je svečana proslava jubileja uz prigodan program na kojoj su prisustvovala brojne zvanice iz javnog života BiH među kojima i ambasadorica Njemačke Ulrike Maria Knotz.

22.06.2013.

Jedna donacija za jedan mladi život

Kompanija Messer od svog osnutka spada u red onih koje su društveno odgovorne i senzibilizirane prema najugroženijim grupama i pojedincima. Svakodnevno radimo na poboljšanju uvjeta za život tamo gdje se nalaze naša postrojenja i uredi i zbog toga je u našoj

djelatnosti izuzetno izražen visok stupanj ekološke svjesnosti, ali i društvene korisnosti.

U Bosni i Hercegovini doprinosimo tako što učestvujemo u akcijama pomoći osjetljivim skupinama i doprinosimo kreiranju bolje slike bh. društva.

U skorije vrijeme mi smo bili među onima koji su učinili da jedan mladi život dobije priliku da normalno participira u društvenoj zajednici. Nakon što je čuo tužnu priču 18-godišnje Azre Rahmanović kojoj se život preko noći promijenio jer su joj liječnici konstatali gangrenu i morali hirurški odstraniti veći dio noge, vlasnik Messera g. Stefan Messer sa generalnim direktorom Messera u BiH g. Valentinom Ilievskim, pronašli su najbolju protetičku kompaniju i kupili protezu za ovu mladu djevojku.

Njoj je jedina želja bila da prije no što liječnici izvrše odstranjenje noge, ode na svojim nogama na naturalnu zabavu.

Želja joj je ispunjena, a danas se ona navikava na protezu i pokušava živjeti kao svoji vršnjaci. Kompanija Messer je tu da joj dalji tok života olakša i podsjeti da sve što mi radimo je namijenjeno životu.

25.06.2013.

Djeca korisnici Messerovih proizvoda

Nema veće radosti za dijete od rođendana. A na rođendanu – zna se, torta je svemir oko koje se sve vrti. I torta mora biti posebna. O njoj se poslije nadugo i naširoko priča. A u posljednje vrijeme najviše se priča o Messerovim tortama. Nazvali smo ih „vulkan torte“.

One su savršene u svojoj neobičnosti. Iz tih fantastičnih torti suklja čokoladna lava i isparava se najdobroćudnija para kao iz crtanih filmova. A filovi tih torti tako su topli, a ostali u čvrstom stanju. Kako? Sve je to zahvaljujući našem produktu – suhom ledu, pomoću kojega se čuda čine i djeca u čaroliju uvode.

Suhi led omogućava fantaziju. Djeca su to otkrila. I ona su postala naši korisnici.

Nema ništa opasno u korištenju suhog leda, pa ga tako i djeca mogu, naravno kao u svemu drugom uz pažnju starijih, upotrebljavati u malim količinama. Jer specijalna isparenja, dimna zavjesa i magličasta mreža daju veći efekt od svega izrečenog. I djeca su sretna jer su dobili nikad viđenu tortu. Tortu koja priča drugačiju priču. I tortu koja je njihovih ruku djelo.

Nema ništa ljepše od toga da usrećite jedno dijete. A mi smo usrećili mnoge.

NEMA SLIKE

02.07.2013.

Messer Mostar Plinu dodijeljena zlatna EIGA nagrada za sigurnost

EIGA je na ovogodišnjoj ljetnoj konferenciji u Dublinu, Irska, Grupaciji Messer dodijelila 2 nagrade za uzornu radnu sigurnost.

Messer Mostar Plin u BiH je za 15 godina poslovanja bez nezgoda nagrađen sa zlatnom EIGA nagradom za sigurnost.

Messer u Francuskoj je nagrađen sa bronзанom nagradom za sigurnost za 5 godina

poslovanja bez nezgoda na lokaciji Folschviller.

Uprava i SHEQ menadžment Grupacije Messer se zahvaljuju svim djelatnicima koji su postupajući na siguran način sa našim plinovima pridonijeli ovakvom rezultatu.

## NEMA SLIKE

13.09.2013.

Messer oglasio dan sigurnosti na radu

Najveća svjetska kompanija industrijskih plinova Messer oglasila je danas u svim svojim društvima dan sigurnosti na radu.

„Ovo nije bilo planirano“ je moto kampanje koja treba da doprinese većoj sigurnosti podizanjem svijesti o kriznim situacijama pri radu.

„Pravovremeno prepoznavanje kritičnih situacija, a zbog kojih dolazi do nesreća, mora se u svakodnevnom i uobičajenim radnim situacijama vježbati“ - rekao je vlasnik i predsjedavajući uprave Stefan Messer.

Naziv kampanje „Ovo nije bilo planirano“ treba skrenuti pažnju na to da nesreće ne utiču samo na planove poslovanja firme. U 11:00 sati je evakuisano svih 120 Messerovih poslovnica u Evropi, Aziji i Peruu. Preko 5.000 uposlenika je moralo neplanirano napustiti svoje radno mjesto i bili su upoznati sa uputama o sigurnosti.

Uposleni u tri bh. društva, Messer BH Gas, Messer Tehnoplina i Messer Mostar Plin, također su na vrijeme izašli pridržavajući se propisanih smjernica.

- Svaki uposlenik naše kompanije mora biti obučen da djeluje u skladu sa našim propisima o sigurnosti na radu. Zbog toga su ove nenajavljene kampanje najbolje naše osiguranje, osiguranje ljudi, objekata i proizvodnje – istakao je g. Valentin Ilievski, CEO Messera u BiH.

„Neplanirana pauza, posebno kada se radi o važnim terminima sa klijentima, može poremetiti vaš radni dan“ - rekao je Hans-Gerd Wienands, finansijski direktor Messera. „Sa ovim neobičnim postupkom smo demonstrirali da nesreće ne znače samo obustavljanje rada, već da znatno mogu uticati i na svakodnevne životne aktivnosti jedne porodice.“

„Mi vidimo svijest o odgovornosti kao dinamičan proces koji kontinuirano podliježe poboljšanjima. Kao poticaj je služilo vlastito zdravlje i zdravlje kolega i kolegica – to je naša najveća vrijednost koja se ne može nadomjestiti“ – istakao je Stefan Messer.

09.10.2013.

Messer omogućio transport humanitarne pomoći iz Njemačke

Kompanija Messer od svog osnutka spada u red onih koje su društveno odgovorne i senzibilizirane prema najugroženijim grupama i pojedincima. Svakodnevno radimo na poboljšanju uvjeta za život tamo gdje se nalaze naša društva i zbog toga je u našoj djelatnosti izuzetno izražen visok stupanj društvene korisnosti.

U Bosni i Hercegovini doprinosimo tako što učestvujemo u akcijama pomoći osjetljivim skupinama i doprinosimo kreiranju bolje slike bh. društva.

U skorije vrijeme mi smo bili među onima koji su učinili da jedan mladi život dobije priliku da normalno participira u društvenoj zajednici. Nakon toga smo našli način da jedno humanitarno udruženje iz Sarajeva nabavi i dopremi potrebnu školsku opremu za učenike osnovnih škola. S obzirom na činjenicu da su u BiH ratne posljedice još vidljive i da se posebno ogledaju u obrazovnom sistemu, svaka pomoć učenicima je dobrodošla.

Humanitarna pomoć koja je za bh. školarce skupljena u Njemačkoj dopremljena je iz Berlina i Laupenheima zahvaljujući Messeru koji je platio transport. Pomoć je adresirana na udruženje iz Starog Grada koje se zove Smješko a koje će tu pomoć distribuirati tamo gdje je najpotrebnije. U pomoć spadaju školske torbe za djecu, školski pribor, pametne table, dva notebooka i drugi dio pomoći koji je upućen za Crveni krst.

Kompanija Messer je tu da svojim društvenim djelovanjem olakša život svima, posebno mladom naraštaju pred kojim je budućnost.

16.11.2013.

Messer podržao manifestaciju „Das ist noć mahalanja“

U prepunoj sarajevskoj Skenderiji 15. novembra ansambl dvije najpopularnije pozorišne predstave u BiH: „Ja, mahaluša“ i „Ja, mahalac“ priredili su nezaboravnu večer smijeha i pjesme koja se održavala pod nazivom „Das ist Noć mahalanja“.

Uz malu pomoć svojih prijatelja, eminentnih estradnih umjetnika Hanke Paldum, Tife, Mostar Sevdah Reuniona, Armina Šakovića te mlađih naraštaja na kojima ostaje muzička scena BiH, dječijeg hora Princess krofne i mlade talentirane pjevačice Naide Čatić, „Noć mahalanja“ dobila je na raspjevanosti i ukupnoj pozitivnoj impresiji.

Glavni akteri „mahalanja“ nenadmašni Dragan Marinković Maca i sjajna Nela Đenisijević nasmijali su sarajevsku publiku do suza prepričavajući na duhovit način scene iz svakodnevnice muškarca i žene. Ljubav na kraju pobjeđuje jer je ona smisao života.

Ove predstave nastale su prema djelima najtiražnije bh. spisateljice Indire Kučuk-Sorguč, a do sada ih je gledalo preko 100 hiljada posjetilaca.

Smijeh je – kažu, najbolje terapijsko svojstvo i najbolji lijek, zato je te noći u Skenderiji smijeh pokrenuo mase i publika je doživjela katarzu.

Za takvu atmosferu jednim dijelom zaslužan je i Messer koji je publiku u Skenderiji nagradio malim ali, pokazalo se u toku večeri, efektivnim poklonom.

Messer BH Gas je napunio dvije hiljade raznobojnih balona koji su poslužili kao teatarska kulisa koja je samo nakratko dijelila aktere od svojih poklonika. A onda su baloni poletjeli u zrak i našli su u publici. Mnogi su ih ponijeli sa sobom kao dragu uspomenu sa jedne odlične zabave.

**Rajlovac/Sarajevo, 06.12.2013**

**Messer donirao kisik bihačkoj bolnici**

Nakon požara koji je ljetos zadesio Kantonalnu bolnicu u Bihaću, čime je prouzrokovana velika materijalna šteta, bolnica otežano radi i za njenu obnovu potrebna su velika materijalna sredstva. U takvom stanju svaka je pomoć medicinskim radnicima i pacijentima

dobrodošla.

Kompanija Messer od svog osnutka spada u red onih koje su društveno odgovorne i senzibilizirane prema najugroženijim grupama i pojedincima. Svakodnevno radimo na poboljšanju uvjeta za život tamo gdje se nalaze naša društva i zbog toga je u našoj djelatnosti izuzetno izražen visok stupanj društvene korisnosti.

U Bosni i Hercegovini doprinosimo tako što učestvujemo u akcijama pomoći osjetljivim skupinama i doprinosimo kreiranju bolje slike bh. društva.

Naša pomoć bihačkoj bolnici izražena je u donaciji kisika u vrijednosti od 5.500 KM. Messer inače godinama opskrbljuje ovu bolnicu kisikom koji je neophodan za liječenje pacijenata sa raznim oboljenjima.

Messer BH Gas je tu da svojim društvenim djelovanjem i svojim sredstvima pomogne uspostavljanju bolje sutrašnjice za sve građane BiH.

